

26 ԵՂ յԱղէքսանդրիա նաւել 'ի Կոստանդինուպօլիս : Իսկ Կիրակոս եպիսկոպոս ձեռնտուութեամբ ազգայնոց արդիւնաւորէր զկալուածս բարեկարգ կառաւորութեամբ , և 'ի նմին ամի առաքեաց յերուսաղէմ սարէնս 300 դահեկանի , և ունէր առ իւր պատրաստ 14,000 դահեկան , զի յորժամ այցելութիւն գտցէ Աթոռն , առաքեսցէ զայն . (1827 . 'ի 27 Յունվարի) :

Այլ վասն եպիսկոպոսին երթալոյ յԵթովպիա , զոր գըրեցին վասն Աբրահամ վարդապետի , ընկալան պատասխանի թէ Գարրիէլ Պատրիարք՝ պատուիրեալ էր նոցա , թէ 'ի կարգել նուիրակունս ծանուցանել ինքեան , և չէին կարող առանց հարցանելոյ նմա առաքել զոք յեպիսկոպոսութիւն . այսպիսեաւ խափանեցաւ խնդիրն : Իսկ հրաւիրակըքն՝ Քրիստոնեայն գնաց յերուսաղէմ մնալ անդ 'ի վանս Հայոց , և այլազգին դարձաւ յերկիր իւր : Եւ 'ի սոյն աւուրս եկեալ էր յեգիպտոս Շամ Դարապուլուսցի ոմն Յոյն Հռոմէական , կեցեալ յԵթովպիա զամս 19 , և պատմեաց Կիրակոս եպիսկոպոսի՝ թէ երեւելի մեծ Վէղիր նոցա , զոր Հայի Մարիամ կոչէին , նա էր որ ջանաց և առաքեաց յեգիպտոս գիրս և հրաւիրակս , և այրն այն վախճանեալ , և հակառակորդք նորա այլ Բղեշխք Հապէշաց 'ի սուր մաշեալ գընտանիս և զգաւակունս նորա , տիրեցին երկրի նորին , ուստի չէր պատշաճ առ ժամն գնալ ումեք անդ , այլ նախ գրել առ Թագաւորն , եթէ հաճեսցի , ապա առաքել . և Կիրակոս եպիսկոպոս ետ գրել առ Թագաւորն 'ի բարբառ արարացոց , պատմելով 'ի նմա զանցս Յակոբ վարդապետի և զմնասիլ նորա անձամբ և ընչիւք . զպատճառ տարադրելոյ անտի եպիսկոպոսին Ղպթոց : Քանզի եպիսկոպոսունք որք գնային անդ , ըստ ամենայնի հետեւելով կամաց նոցա՝ ըստ սովորութեան նոցին կատարէին զամենայն եկեղեցական ծէսս . իսկ վերջինս այս կամեցեալ է փոփոխել ինչ ինչ և նոր ծէսս մուծանել յեկեղեցիս նոցա , և 'ի չընդունելն Հապէշաց՝ բանադրէ զնոսա , և Հապէշք վառեալ բարկութեամբ հանդերձ Թագաւորաւն կամեցեալ են իսպառ 'ի բաց կալ 'ի քրիստոնէական սուրբ հաւատոյ և սխալտել զկուռս , այլ ոմանք 'ի խոհեմագունից նոցին այսուիկ շիջուցանեն զարբոք բարկութեան նոցա ,